

涉廣聊扶

齊志異
風傳異
信拾

志記遺錄



涉 異 志

閔 文 振 撰

叢書集成初編

(補印本)

涉異志及其他三種

一九三九年十二月初版
一九五九年十月補印

商務印書館出版

上海虹口印刷廠印刷

紀錄彙編卷之二百十一

涉異志

閔文振

石真妃

羅源紫霄巖有二女神號石真妃靈顯頗著永樂
初出海軍張元誨等戴星過嶺遇轎二乘侍女數
輩執燭籠前導元誨等疑爲于歸之婦弛擔候之
忽然不見知爲二妃叩謝而過二妃者其初羅源
徐公里石氏女也姊曰月華妹曰雪英皆有姿色
涉書史五季末處州青巾賊作亂二女被擄義不

受辱相繼投河死宋時林孝子戇孫入山採樵遇
二女明妝儼然肅入其家延茶久之月華吟曰世
亂年荒起盜兵紛紛螻蟻尚逃生妾身不幸遭俘
虜雨涕何時積恨平百尺潺湲探禹穴寸心皎潔
付陶泓皇天不泯堅貞女召拜雲階浪得名雪英
吟曰昔日繁華若轉蓬千璣萬琲總成空肉芝勝
比蓮花鮮甘露何如竹葉醲物外煙霞隨處得世
間風雨任牢籠知君已有曾參行暫與尋常一徑
通吟畢謂戇孫曰吾石氏女遭難而死上帝憫吾
貞烈勅吾爲火部曜靈真妃吾妹爲水部風毒真

妃封此巖爲紫霄巖命吾主之俗呼曰石八娘巖
是也君以孝聞今雖貧不久當貴已而相別送出
慙孫回望無復人宇矣

張太子

浮梁東隅有昭烈廟祠唐張巡設像旁侍曰張太
子永樂戊子士人卜秋舉降筮曰玉霄一點墜雲
端難失佳人一不全敲斷鳳釵文不就貴人頭上
請君看蓋王英高中四字也是秋果然英山東濱
州人其父斌爲浮梁令以父任應舉云又士人袖
芭蕉葉入云我非問功名第言袖中何物詩云兩

手懷來一葉青知君無意問功名可憐昨夜三更
雨滅却窗前數點聲又士人得異草來問其名詩
云蘇武當年膽氣雄匈奴一箭射飛鴻至今血染
堦前草一度秋來一度紅蓋名鴈落紅云如是者
莫可枚舉或謂是時有旅觀寓廟中必其所爲後
觀移而神不顯

戚侍郎

黃巖侍郎戚公存心布衣時貧甚有憐其才欲妻
以女者患其無以自給但與盟曰發身即完婚邑
有厲壇荒僻攢棺甚衆人不敢近富家少年戲曰

厲壇第七棺中貯錢三百文秀才今夜能取之乎
公許諾少年以餅十四枚畀之使分置各棺以爲
驗至夜少年先携錢置棺中匿棺旁頃之聞羣鬼
相語曰戚侍郎來此盍出避惜此人不獲令終耳
已而公至羣鬼辟易匿榛莽間公分置餅各棺取
錢而去恬然無懼明日少年賀公曰秀才位至侍
郎也但當慎晚節耳後登進士完婚累官工侍以
同邑賀侍郎譖果棄市

黃鰓道

宣德四年七月寧德督銀場太監周覺成至邑之

十三都青巖之地下令毒魚各溪煉巨石投水中
爆裂俾魚驚驚奔盡出是日有道人入門泣告曰
一切蠢動咸有佛性乞減藥石三分少存微命覺
成不聽但啗以蔬飯道人含泣食盡而去已而各
溪魚鱉盡斃有大黃鰻獨異羣魚剖其腹所食蔬
食俱在覺成未幾病劇恍惚見道人携其顙萬數
索命遂死

關山隸

少叅臨海范公文初下第歸自杭心急抵家馳至
關山時已四鼓稍憇嶺上遇隸兵至進曰君何爲

破曉至此公曰不才落第白日無顏過此故也隸
兵曰君他日登甲第仕爲郡終參藩何慮也公謝
曰安得有此因詰曰汝安得至此荅曰我奉官差
至新昌拘罪人聞其人在此山下故來此今同君
下山也至山麓公曰饑甚隸兵走入田家取粥一
盂食焉食訖隸兵送孟還田家囑曰君宜少候山
下有虎不宜獨往也隸兵出偕行至人家門隸兵
曰我入此家若聞哭聲我走君即走少頃果有猛
虎咆哮而過隸兵于門內拘一人踰牆出即聞哭
聲公遂驚走平明乃止始悟隸兵爲陰司攝人之

鬼也其後登景泰甲戌進士仕官悉如所言

木自動

連江人倪神保幼失父母常念罔極之恩不能報
與其妻林氏共禱于天欲得一木兩枝連理而生
者取之刻父母像以祀焉乃徧求山中至石芹山
見二木同生倪乃拜祝曰此水果可刻吾父母當
自動者三祝畢其木交股搖動凡三而止即取以
歸傭工厚值刻之既成祭哭奉于中堂凡飲食供
奉出告反向一如事生之義

禱雨文

景泰五年七月寧德旱甚邑民禱雨西山龍湫疏
文未善投之須臾別浮片紙取視之乃元至正間
禱雨文也其辭曰某等俯陳蟻悃仰瀆龍顏乞鑒
凡心願舒聖眼言念生居在世治本於農蒙天地
覆載之恩感雨露滋濡之德春耕夏耨敢辭塗足
之勤秋穫冬藏實切資身之望不期茲歲忽值恒
暘爰從九夏之初逮及三秋之始已經六旬不雨
忍見千里揚塵石燕停飛商羊絕舞致泉源之既
竭慨旱魃之爲凶知作孽自我烝民故降災實由
上帝爰深脩省特致禱祈虔取某時恭詣龍湫恪

求聖水願施甘雨稍救枯苗伏願龍顏大悅賜消
滴于金瓶龜拆全滋霈霧沱於隴畝庸副實粟之
詠預占大有之祥垂佑我民迓續乃命云云衆爲
誦之須臾大雨如注

鳥引屍

嚴陵盧廷俊爲臨川知縣時有饒姓女許唐家子
未嫁女私于人一日壻至女家嗔而殺之匿其屍
壻母訴于縣女家不承廷俊焚香祝天曰願雪壻
冤翌日之後有鳥飛鳴甚哀廷俊曰得非死者訴
冤乎果爾宜前導鳥即飛而前使人尾之至深谷

中乃得屍女家驚服抵罪

死作城隍

天順間陳潔爲羅源知縣多善政將歿有人夢城隍司使者打掃甚警傳呼新城隍上任及至乃潔也次日潔卒又邑人陸引爲象山縣丞有政聲勞思致疾城隍閭者夢中恍惚聞人喚新官到任急爲灑掃閭者問爲誰荅曰陸相公也及覺引果卒士民知其事並詣廟哭奠

方景明

陝州千夫長方景明死踰年一日憑巫語曰吾今

隸鄴都職掌鬼籍世之死者皆吾錄也囑吾妻善
誨二子綜理家務勿失所可矣語訖而去未幾有
戍卒病卧數日友人來問病語之曰吾適似夢似
覺見方侯與語欲吾爲用錄姓名而去所錄甚多
吾友之名亦在焉宜早爲後計友人方無恙聞之
大駭悔惡而出次日戍卒果死又數日友人亦死

鷹神

大興太宰劉公機初爲秀才時畿郡有鷹神乃一
獵鷹也一日飛止公宅造糞飼之偶不潔鷹攫其
奴若懲之者居數日呼公名語曰公大貴人他日

當得八人檣轎叅贊南京已而飛去公後舉進士累官兵部尚書叅贊南京機務如鷹語云

霍童古墓

寧德霍童鄉有古墓成化間有近地居氓偕山人往視將發而莖其父是夕夢老人告曰汝欲發此墓盍不效孫文祥乎若發當有禍氓覺而驚然不悟孫文祥爲何等語乃徧叩士夫一日有以福寧志藁示之者乃知孫文祥福寧人也宋開禧間自浦城解館歸道經霍童鄉日暮忽見山旁有屋遂投宿焉夜半聞內寢慟哭問故有夫婦曰吾子不

肖將鬻此屋明旦當徙幸遇仁人至此不覺悲傷
文祥曰子孫賣宅爲貧故也勿慮吾爲汝謀之其
夫曰若爾當厚報寢至旦視其處乃荒塚也心甚
異之候至日午果見衣縕袍者以豪右僕從持畚
鍤至文祥詰之對曰家貧將祖墳遷葬以地鬻人
度活耳文祥曰慎勿鬻此我調汝貧因傾囊與之
不告姓名而去後數夜夢寄宿夫婦拜曰向日厚
恩莫報今捧二鳳雛相謝遂孕二子長曰附鳳次
曰翼鳳後並登科第官至公卿氓乃大驚曰報應
如此吾敢葬此墓哉事遂寢